

Escoita, vai escoitando,  
non toda a vida é tormento,  
dos corazóns xorde o canto,  
medra no traballo lento.

Escolle, vai escollendo  
de toda a festa o cantar,  
o que lle ten sentimento,  
o que mellor vai soar.

Escolle, vai escollendo,  
aprendendo, preguntando,  
as evas que tiña o mundo  
que pouquiñas van quedando!

Recorda, vai recordando  
que rápido van os tempos,  
o pandeiro no faiado,  
o cantar levouno o vento.,

Escoita, vai escoitando,  
escolle, vai escollendo,  
recorda, vai recordando  
con orgullo e sentimento.

Con orgullo e sentimento  
ollos pechados no canto  
a voz tinxe o silencio  
o pasado latexando.

Con orgullo e sentimento  
a súa vida nos cantos,  
cantos dos que van morrendo,  
muiñeira dos camposantos.